

四庫全書

史部

欽定四庫全書

欽定續通志卷四百七十二

列傳

元 二十六

昂吉爾

哈喇岱

沙全

特穆爾布哈

薩奇蘇

額納格爾

實保

特哩

阿錫頁

庫庫

圖古勒

昂吉爾張掖人姓額卜氏世為西夏將家歲辛巳父額

卜幹布率所部歸太祖以其軍隸蒙古軍籍

按原史別立額卜幹

布傳纒載昂吉爾官爵及其子昂哈圖事顯係重出今並刪歸本傳

從穆呼哩出征病卒

昂吉爾領其父軍從征諸國有功至元六年授本軍千

戶畧地淮南所向無前時宋輸糧金剛臺意將深入昂

吉爾將兵馳往斷其輸道因上言請城信陽以扼宋得

旨令率河西軍一千三百人城之城成九年加信陽軍
萬戶丞相巴延渡江留阿珠定淮南東道其西道則屬
之昂吉爾駐兵和州宋淮西制置夏貴遣侯都統將兵
四萬來攻有謀內應者悉誅之潛兵出千秋澗塞其歸
路因出城奮擊大敗之鎮巢軍降阿蘇軍戍之人不堪
其橫都統洪福盡殺戍者以叛昂吉爾攻拔其城擒福
及董統制遂攻廬州宋亡夏貴舉所部納款

按宋史洪福傳及續

通鑑云洪福者夏貴家僮也知鎮巢軍貴既降使其從
子括福福斬之貴請單騎入城門發而伏兵起福被執

不屈而死本傳云鎮巢軍降且叙
夏貴納歎于福死之後均異宋史

昂吉爾入廬州民按

堵無所犯遷淮西宣慰使宋丞相文天祥復起兵海道

舒民張德興應之襲破興國德安諸郡還據司空山詔

昂吉爾攻之一戰而定江左初平官制革荆權臣阿哈

瑪特納賂鬻爵江南官僚冗濫為甚昂吉爾入朝具為

帝言之即奉命偕平章赫伯左丞崔斌等減汰之選曹

以清時兩淮兵革之餘荆榛蔽野昂吉爾請立屯田以

給軍餉帝從之累遷行尚書省右丞兼淮西宣慰使都

元帥日本不庭帝命安塔哈等征之昂吉爾上疏請罷
兵息民不從既而師果無功昂吉爾屢為直言臺臣慮
其難制以雅伊密實為本道按察使以察之雅伊密實
時捃摭昂吉爾細故以聞及廷辨帝察其無他輒遷其

官後竟以微過罪之

按富珠哩劄作劉天福神道碑云
昂吉爾間淮二十年掄制兵民潛

結中奧縱盜出沒淮海天福捕其黨七人殉于市帝
聞遣使馳訊昂吉爾以罪廢本傳所云恐失其實元

貞元年卒子昂哈圖充舒庫爾齊至元二十四年從征
納顏有功代其父職二十六年授廬州蒙古漢軍萬戶

府達魯噶齊大德六年領兵討宋隆濟等還鎮廬州以私財築室居軍士之貧者事聞陞其秩泰定四年卒

哈喇岱哈魯氏初從軍攻襄樊蒙古四萬戶府辟為水軍鎮撫至元十一年從丞相巴延渡江改管軍百戶十二年從丞相阿珠與宋兵戰焦山敗之進攻江陰許浦金山上海崇明金浦皆下之遂戍溲浦海口十三年宋將張世傑舟師至慶元朐山東門海界哈喇岱追之守定海港口兩退宋兵復引兵至温州青嶼門遇宋兵遣

使諭守臣家之柄以城降至福州擒毛監丞等十四年
授沿海招討副使鎮守沿海上下南至福建北距許浦
督造海船千艘右丞達春等攻廣南進沿海招討使時
宋處州兵復温州哈喇岱率兵復取之進至潮陽縣宋
都統陳懿等兄弟以奮兵七千人降達春攻廣州踰月
未下哈喇岱繼至諭宋安撫張鎮孫侍郎譚應斗以城
降從攻張世傑于大洋諭南恩州宋閣門宣贊舍人梁
國傑以奮軍萬人降十五年入覲擢沿海左副都元帥

慶元路總管府達嚕噶齊將所部軍戍海口十六年海賊賀文達顧潤等寇掠海島哈喇岱諭降之十八年從

征日本值颶風舟回

按日本傳至元十八年征日本至平壺島風破舟棄士卒十餘萬於

山下本傳僅云舟回諱詞也

明年還戍慶元二十五年拜中書左丞

行浙東道宣慰使大德五年徵入見擢雲南行省右丞

偕劉深征八百媳婦國至順元土官宋隆濟等叛

原文作至

順元年宋龍濟等叛按成宗紀宋隆濟叛在大德五年及經世大典云劉深等征八百媳婦國道經順元土官宋隆濟叛則年字乃土官字之訛

龍字乃隆字之訛也今並改正

喪師而還深伏誅哈

喇岱亦以罪廢十一年卒皇慶元年贈鞏國公諡武惠
子哈喇布哈襲沿海萬戶府達嚕噶齊

沙全哈喇婁氏父沙迪世居沙漠從太祖平金戍河南
柳泉家焉全初名綽爾齊甫五歲為宋軍所虜年十八
留劉整幕下宋人以其父名沙迪使以沙為姓而名曰
全中統二年整以瀘州來歸全與之同行授管軍百戶
至元三年整出兵雲頂山與宋將夏貴兵遇全擊殺甚
衆五年整領都元帥事圍襄樊以全為鎮撫遣攻仙人

山陳家洞諸寨破之陞千戶敗宋將張貴拔樊城與劉
整軍會修正陽城引兵渡淮與宋將陳安撫戰敗之十
二年從丞相阿珠與宋將張世傑孫虎臣大戰于焦山
水陸並進宋人不能支敗走進攻常州克之乘勝下沿
海諸城至華亭戒士卒毋殺掠遂傾城出降以功授華
亭軍民達嚕噶齊時有未附鹽徒聚衆劫掠全擊破之
籍其名請于行省遣屯田于淮之芍陂行省以邑人新
附時有反側欲屠其城全言鹽卒多非其土人若屠之

枉死者衆以死保其不叛遂止尋陞華亭為府以全為
達嚕噶齊招降盜賊境內得安改松江萬戶府達嚕噶
齊專領軍政二十二年召見遷隆興萬戶府達嚕噶齊
得請復舊名曰綽爾齊未幾帝以松江瀕海重地復命
鎮之卒于官

特穆爾布哈塔塔爾岱人父塔齊歲乙未

按太宗紀六年甲午遣塔

海幹布征蜀此云歲乙未則

是太宗之七年也互異同都元帥塔海幹布將兵入

蜀攻下興元成都諸郡中統二年授西川便宜都元帥

俄進行樞密院率諸軍略定西川未下郡邑至元元年
遷益都等路統軍使死軍中特穆爾布哈中統初入備
宿衛至元七年授淄萊水軍萬戶赴襄陽與宋將范文
虎戰于灌子灘大敗之十一年授益都淄萊新軍萬戶
從丞相巴延伐宋敗其大將夏貴於陽羅堡大軍渡江
論功最多又從下鄂斬黃江建康常秀蘇杭諸郡從參
知政事阿嚙罕畧定紹興溫台福建諸郡授台州路總
管府達嚕噶齊遷廣東宣慰使十六年加都元帥追宋

將張世傑於香山島世傑死降其衆廣東諸郡及海島
盡平入見授中書左丞行省江西二十五年拜四川等
處行尚書省平章政事兼總軍務改行中書省平章政
事其兄特穆爾托噶

經世大典作
特穆爾托噶

初以蒙古軍千戶從

伐蜀有功授萬戶從大軍攻重慶重慶降收其衆徇下
流諸城留鎮夔門兼本路安撫司達嚕噶齊遶陞諸蠻
夷部宣慰使加都元帥伊實布希蠻叛與雅爾哈會兵
討平之改征緬都元帥死于軍

薩奇蘇回鶻人其國阿達都督托果斯之次子也初為
太祖弟烏珍筆且齊領王傅烏珍薨長子濟伯格蚤世
嫡孫塔齊爾幼庶兄托迪欲廢嫡自立薩奇蘇與和爾
果斯馳白皇后乃授塔齊爾以皇太弟寶襲爵為王以
功分治黑山以南之地從憲宗攻釣魚山建言乘勢定
江南帝嘉納焉憲宗崩額呼布格爭立諸王多附之薩
奇蘇馳見塔齊爾力言宜協戴世祖塔齊爾從之及世
祖即位授北京宣撫使劬奸抑疆遼東以寧會高麗有

異志帝遣使究治則委罪于其臣洪察呼械送京師道
遼東薩奇蘇訪知洪察呼以直諫迂意即奏疏為直其
事帝命釋之李瓊叛命帥師從宗王噶必齊討之瓊伏
誅噶必齊欲屠城薩奇蘇力爭止之衆大悅授山東行

省都督遷經畧統軍二使

按世祖紀云分益都軍民為
二董文炳領軍薩奇蘇治民

與本
傳異

兼益都路達嚕噶齊時兵燹後民乏牛具為之上

聞驗民丁力官給之統軍超布哈田遊無度害稼病民
元帥伊蘇岱爾據民田為牧地薩奇蘇隨時表聞有旨

杖超布哈令伊蘇岱爾還其田壇故將毛璋欲率諸部
謀執薩奇蘇以歸宋璋黨上變乃襲璋斬之薩奇蘇嘗
慕古人舉親舉讎之義叛帥故卒得與子姓參用公論
多之山東歲屢歉為請粟賑卹又奏蠲其田租山東人
刻石頌德卒諡襄惠

額訥格爾字正卿其先屬永古特部徙居臨洮之狄道
金畧地盡室遷遼東曾祖特穆爾英格仕金為馬步軍
指揮使官名有馬因以馬為氏祖博索瑪伊爾徙淨州

按元地理志淨州路領縣天
山原文作靜州誤今改正

之天山宣宗遷汴父實喇

齊蘇為鳳翔府兵馬判官死國事額訥格爾好學負氣
會國兵破汴侍母北行間關鋒鏑中北見憲宗命贊布
扎爾為斷事官以燕故城為治所額訥格爾慨然以治
道自任政事修舉歲壬子料民丁于中原凡業儒者試
通一經即不同編戶著為令甲儒人免丁實額訥格爾
始之也嘗建言立常平倉舉賢士楊春卿張孝純輩分
布諸郡號稱得人又羅致名士敬鼎臣授業館下薦引

馬文玉牛應之輩為參佐後皆位至卿相己未世祖以親王南征從行至汴令專饋饌及世祖即位將親征額呼布格額訥格爾市馬以助軍帝厚贍其家拜禮部尚書四年南邊不靖建言光穎等處立權場歲得鐵以鑄農器易粟輸官不惟官民兩便因可以鎮服南方詔以本職兼領煇冶未行以疾卒贈梁郡侯謚忠懿子孫登仕籍者甚衆曾孫祖常自有傳

實保輝和爾人父奇凌貝鄂齊爾智勇過人歸太祖輝

和爾從征回國數立功將重賞之自請為本國古魯城達嚕噶齊從之卒實保事世祖潛却命長筆且齊中統元年為戶部尚書宗正府扎爾古齊額呼布格之叛帝命實保詣河西督糧至西京北聞萬戶阿實克特穆爾將從額呼布格實保矯制召其軍赴行在委曲諭之且以西京錢糧給其軍遂率見帝帝曰戰陣之間得一夫之助猶為有濟實保以二萬軍至其功豈少哉海都叛世祖將討之先命實保傳旨往諭海都聽命既退軍

置驛

按特哩傳云使至海都欲伺其隙謀害之與此所云聽命退軍者互異

而丞相安圖

軍先已克和爾和大王部曲海都謂實保曰我不難於殺汝念我父嘗受書於汝姑遣汝歸以安圖之事聞非我罪也實保以聞命為中書右丞商議政事妻以宗王之女博囉章公主明年復使海都諭之來歸海都辭以畏死不敢實保奉使奔走三年時年已七十矣命為翰林承旨給全俸養老後卒子烏嚕斯哈美至元二十三年授浙東宣慰使浙東盜起鑄印璽僭稱天降大王烏

嚕斯哈美討平之移鎮廣西峒蠻羅天佑作亂招降之
卒子耀珠宗正府扎爾古齊

特哩奈曼人居絳州祖拜布哈為宗王巴圖傅特哩有
謀畧早歲宿衛王府巴圖分地平陽以特哩監隰州中
統初調平陽馬步站達嚕噶齊至元初宗王海都叛廷
議欲伐之世祖以宗室之情欲擇謹密者往使焉左右
以特哩對遂召見帝嘉其辯慧曰此事非汝不可然必
先詣巴圖蒙古特穆爾王所相與計事而後行使二人

副之特哩既奉命欲直造海都境副者弗從以上命不可特哩曰親承密旨汝輩違則當誅副者懼而從之既

至海都日召宗親宴飲將伺其隙謀害之

與前傳
互異

特哩

厲聲曰且食勿語望語言脫口相撫為罪耶良久海都曰直哉因厚贈以行既至巴圖蒙古特穆爾王所具告以故王曰祖宗有訓叛者人得誅之如通好不從奉使以行天罰我即外應勤絕不難矣特哩還悉以事聞後屢使巴圖王所道遇海都遊兵副者前行遇害特哩後

至曰我為天子使可以非禮犯耶游兵語屈乃釋之遂
獨得還帝嘗謂侍臣曰有特哩則朕之宗族將不失和
矣海都覘伺巴圖王為備已嚴意乃帖然特哩始終凡
四往返歷十四年帝謂曰在朝官之要重者惟汝所擇
對曰臣母在絳州老且病得侍朝夕幸也詔從其請授
絳州達魯噶齊十五年平陽李二謀亂特哩捕問盡得
其狀十八年病卒於官子達蘭台嗣官

阿錫頁西域佛琳人通西域諸部語工星厯醫藥初事

定宗直言敢諫時世祖在藩邸罷之中統四年命掌西
域星厯醫藥二司事後改廣惠司仍命領之世祖嘗詔
都城大作佛事集教坊妓樂及儀仗以迎導阿錫頁奏
曰高麗新附山東初定江南未下天下疲弊此無益之
費甚無謂也帝嘉納之至元五年從獵保定日且久乃
于帝前語供給之民曰得無妨爾耕乎帝為罷獵十三
年丞相巴延平江南還姦臣以飛語讒之阿錫頁叩頭

諫得解

接巴延傳云巴延取宋而還阿哈瑪特誣以平
宋時取其玉桃盃帝命按之無驗遂復其任

尋奉詔使西北宗王鄂勒歡所既還拜平意政事固辭
擢秘書監領崇福使遣翰林學士承旨兼修國史大德
元年授平章政事成宗崩內旨索星厯秘文阿錫頁厲
色拒之仁宗時封秦國公卒追封佛琳忠獻王子阿里
雅秦國公崇福使達罕翰林學士承旨哈斯光祿卿奇
爾濟蘇同知泉府院事老哈廣惠司提舉

庫庫字子清本默爾奇斯氏部族世居布爾罕呼爾敦
之地其俗驍勇善騎射諸族頗憚之國初舉族內附世

祖居潛邸選庫庫為近侍歲甲辰世祖聞王鶚賢徵至
問以治道命庫庫與廉希憲皆師事之庫庫每旦起盛
飾其冠服鶚讓之庫庫悔悟明日純素以進鶚乃悅壬
子奉命僉諸路軍籍所至無擾人皆德之及還命領燕
京匠局世祖即位特授中書左丞未幾遷大名路宣撫
使卒子堅童字永叔少孤甫十歲即從王鶚游既長奉
命入國學復從許衡游弱冠入侍禁廷累官御史臺侍
御史至元二十四年扈從東征屢戰有功遷燕南河北

道肅政廉訪使遂拜河南行省平章政事驛召赴闕未拜以疾卒

圖古勒字親臣喀喇伊聶之孫雅爾達實第九子也自幼侍世祖命與額森特穆爾博果密從許衡游帝問其所學圖古勒對曰三代治平之法也帝喜除蒙古學士客省使進兵部郎中遷僉太史院嘗燕見世祖屢陳古今治亂政要多所裨益至元二十年遷中書右司郎中未幾大宗正色徹肯薦掌其府判署閱諸獄文案嘗暮

歸愀然曰今日所議死案於心有疑未得所以活之他日歸喜曰我得之矣於法當流徙邊地遷吏部尚書時哈喇哈斯為湖廣平章嘗與圖古勒同在大宗正素知其賢舉以自輔遂授湖廣右丞時湖南北多盜圖古勒擒殺盜首喬大使尸諸市羣盜頓息湖南宣慰張國紀

創徵夏稅民弗堪圖古勒屢請罷之

二事見哈喇哈斯傳並作哈喇哈斯

事

二十九年辰州蠻叛副樞劉國傑僉院蘇瑪拉移文索辰澧沅間弩士哈喇哈斯以民弗習戰弗許圖古勒

曰因蠻攻蠻古所利遂與之果以此獲勝成宗即位遷
江浙右丞適歲旱方至而雨民心大悅未幾召還遷樞
密副使大德七年卒贈趙國公諡文肅子舒蘇晉寧路
總管

欽定續通志卷四百七十二

欽定四庫全書

欽定續通志卷四百七十三

列傳

元二十七

達春

巴延

伊克德濟

額森鼐爾

托里實克

呼喇珠

丹珠爾

托歡

錫里巴

布呼齊

齊喇

安巴

伊蘇岱爾

實都爾

達春蒙古扎拉爾氏父扎拉台歷事太祖憲宗歲甲寅奉命伐高麗破之舉國遁入海島己未高麗遂內附扎拉台之功居多達春以勲臣子累遷東京等路行中書省右丞改授遼東道宣慰使達春探知納顏謀叛馳驛上聞有旨命與皇子阿雅噶齊同力備禦女真碩達勒達官民與納顏連結達春遂棄妻子與麾下十二騎直抵建州與納顏黨岱遜巴圖爾等合戰兩中流矢繼知

其黨欲襲皇子阿雅噶齊遂扈從皇子渡遼水納顏軍
來襲達春轉鬪而前射其首特古斯岱墮馬死追兵乃
退遂軍懿州州人羅拜泣曰非宣慰公吾屬無遺種矣
至遼西小龍泊得叛首史托里台盧全等納款書期而
不至遣將討擒之又獲其黨王色克復與齊達勒大王
等戰破之追納顏餘黨北至金山二十八年充蒙古軍
萬戶是歲復領軍討哈坦還攻建州逐阿哈投江死明
年哈坦涉海南襲高麗達春復進兵討之入朝拜遼陽

等處行中書省平章政事卒于位子達蘭特穆爾

巴延河西人父胡土克圖以質子從太祖征河西太祖立質子軍號圖魯格遂以胡土克圖為百戶憲宗朝都元帥耨埒承制以為千戶從征西川呼圖克叛于臨洮世祖命胡土克圖等從大軍往討之尋卒巴延襲至元九年授征行千戶十年宋師侵成都迎擊大敗之又從行省伊蘇岱爾攻嘉定從行院呼敦取瀘叙攻重慶數有戰功十二年為東西兩川蒙古漢軍萬戶總帥汪良

臣原文作汪特格誤
今据汪良臣傳改用兵忠州命巴延將兵二千往涪

州策應宋人以舟師邀于清江巴延引兵馳赴擒其部將李春等十七人十三年瀘州復叛行院遣巴延領兵趨珍珠堡敗其將王世昌移戍暗溪砦宋合州兵來援復生擒百餘人戮之遂克瀘州行院副使布哈進圍重慶遣巴延將兵游擊重慶降制授蒙古漢軍總管十九年陞管軍萬戶卒子塔齊爾嗣

伊克德濟實喇妻人祖實達爾摩哩歸太祖從征回回

諸國又從睿宗及徹伯爾諭降河西諸城後從攻臨洮
死焉父昭喇卜和卓從太宗滅金又從憲宗攻蜀為萬
戶府達嚕噶齊歿于軍中統二年伊克德濟為千戶數
有戰功下五花石城白馬等砦至元七年宋兵入成都
伊克德濟以兵四百人相拒四日宋兵退追擊破之授
蒙古寶喇婁河西漢軍萬戶戍眉州從圍嘉定築懷遠
砦以守其要害宋兵出戰輒敗十二年入朝加上萬戶
會圍重慶盡督馬湖江兩岸水陸軍馬十四年從圍瀘

州先登拔之從攻重慶屯佛圖關屢戰有功移屯堡子
頭宋守將趙安開門降重慶既平畧地思州進四川宣
慰使都元帥十七年征鄂端拜雲南行省參知政事二

十一年

經世大典
作二十年

與右丞台布諸王桑阿克達爾分道

征緬攻江頭城拔之命都元帥袁世安守之圖其地形
勢遣使詣闕具陳所以攻守之方遣哈迪爾楊林等諭
緬使降不報遂督軍水陸並進擊破之建都金齒等十
二城皆降命都元帥哈達萬戶布都瑪勒等戍之二十

八年改四川行樞密副使卒子和尼齊德濟雲南都元帥額埒蘇襲蒙古軍萬戶

額森孛爾輝和爾人父都沁哈雅從太祖太宗平金及西夏俱有功額森孛爾幼事世祖于潛藩從征土蕃雲南常為前驅歲己未伐宋至鄂州先登奪其外城中統元年從征額呼布格與其黨遇大呼馳擊之其眾駭潰明年討李璫以功授西道都元帥土蕃宣慰使額森孛爾素熟夷情恩威兼著頑獷悅服歷二十四年遷雲南

行省平章政事尋改江西行省平章政事巨盜鍾明亭
積年為害額森彙爾討擒之成宗即位召還改陝西行

省平章政事謝事歸隴右十年卒贈鞏國公

按王圻續
通考載元

貞初封鞏國公此
云歿後追贈五異謚敏忠子鄂勒哲中書平章政事

托里實克輝和爾人祖巴爾斯呼圖克托噶阿吉齊國
初以兵從攻四川歿于軍父特爾格齊托噶阿吉齊憲
宗命長哈瑪爾及察遜諸宗藩之地瑛塔哈阿勒達爾
叛執特爾格齊械繫之破械脫走入覲世祖賜令襲父

職命率所部兵就征之又從諸王鄂囉齊討建都陞羅
羅斯副都元帥同知宣慰司事至西蕃境上蕃酋遮道
不得進特爾格齊戰却之道遂通卒于官托里實克襲
職所部有產金戶叛服不常托里實克討平之定昌路
總管古納叛與其千戶阿夷謀率衆渡巴斯哩河托里
實克引兵戰擒阿夷殺之德平路落來民叛又討平之
亦奚不薛地未附民多立寨依險自保詔從左丞愛魯
克往討之托里實克先至拔其寨愛魯克命率兵攻羅

羽及怯兒地皆破之遂平亦奚不薛又與行省參政阿
哈巴克實攻蠻子童降其衆進管軍副萬戶蠻細狗折
興等及威龍州判官阿遮皆憑險為亂托里實克夜入
據其寨賊散走遣兵搜獲阿遮斬之籍其民為農入覲
授羅羅斯宣慰使兼管軍萬戶既還昌州蘇你巴翠等
作亂奉雲南王命討降之徙其衆于昌州平川鎮守千
戶任世祿乘間遁去托里實克據其要路阨之世祿降
復入覲卒于京師子索諾木巴勒官至鎮國上將軍

呼喇珠蒙古氏曾祖鄂齊爾事太祖為博囉齊祖齊都

爾從太祖征欽察喀喇回回等國有功又收河南關西

諸路得民戶四萬餘為涿州達魯噶齊卒

按原史別立齊都爾傳與

本傳所載略同顯係重出今刪歸本傳

伯父哈拉珠襲職以功稍遷益都

路蒙古萬戶歿于軍呼喇珠襲職至元十二年攻宋六

安軍行省命領諸軍戰艦遇宋軍敗之軍次安慶又敗

宋孫虎臣于丁家洲戰于朱金沙又敗之戰于焦山江

中時丞相阿珠督戰呼喇珠與董文炳冒矢石沿流塵

戰身被數傷，屢創力戰，勝之。宋張殿帥攻呂城，呼喇珠與萬戶釋圖生擒之。從下常州，畧地蘇、湖、秀、州。至長橋，大敗宋軍。十三年，據巴延傳增至臨安，巴延命呼喇珠守浙

江亭及北門，敗揚州軍于揚子橋。又敗真州軍，追李庭芝至通州海口，盡降淮東諸州。江南平，遷湖州。路達嚕噶齊十四年，進淮東，宣慰使奉旨屯守上都，累遷江淮行省。除右丞，拜江浙行省平章政事卒。

丹珠爾蒙古達勒達岱人。至元七年，從征蜀，敗宋兵于

馬湖江九年從征建都蠻十一年從攻嘉定敗宋兵於
夾江又從下瀘敘諸州進圍重慶敗宋將張萬瀘州叛
諸軍將攻瀘丹珠爾先將其衆據紅米灣與宋兵戰敗
之進至安樂山連敗宋軍破石磐寨十四年抵瀘州奪
其戰艦五艘還至安樂山復敗宋兵從諸軍拔瀘州張
萬舉兵欲向合州丹珠爾以銳卒邀擊於龍坎萬引卻
授管軍千戶從征鄂端至甘州陞總管十九年從諸王
赫伯元帥蒙古岱軍至鄂端與叛王約羅等戰勝之二

十年諸王已拜叛丹珠爾獨破之進副萬還戍長寧軍
宋好止寨以兵來襲擊走之二十六年授平陽等路萬
戶達魯噶齊卒子濟延圖布哈襲

托歡扎拉爾台氏父托多為萬戶從皇子庫春呼圖克
圖畧汴宋睢宿等州歲癸丑鎮蔡州托多卒子布哈襲
布哈卒弟阿勒達爾襲阿勒達爾卒弟長壽襲並為千
戶守蔡長壽卒托歡襲至元十一年從丞相阿珠攻陽

羅堡累有戰功渡江攻鄂漢諸州下之十二年

按世祖
紀及阿

珠傳攻陽羅堡至元十一年會宋軍於丁家洲在十二年傳未詳載今據增會宋軍于丁家

洲托歡突入奪戰艦數艘攻建康太平等郡下之宋都統姜才攻揚子橋堡托歡連擊敗之會萬戶實喇罕入朝道滁州為宋兵所遮托歡擊敗宋兵出實喇罕從攻揚州至泥湖遇宋軍奪三十餘艘遂進兵蘇州與宋軍戰擒柳奉使十三年右丞相遣托歡援高郵軍擊宋高郵都統敗之十四年太平路總管府達嚕噶齊會珠爾噶岱寇北邊帝命托歡往討之有功十五年從親王烏

爾古岱丞相博囉西征有功加福州路總管府達魯噶
齊平閩盜改武昌路卒

錫里巴蒙古人祖齊呼勒圖從太祖經畧西夏有功又
隸諸王卓沁台領博囉齊與金人戰歿于陣父瑪拉噶
嗣從征阿勒達爾亦有功錫里巴世其職由樞密院斷
事官為河南行中書省斷事官至元七年引水軍四萬
攻襄陽八年宋將范文虎來援錫里巴敗其軍進圍樊
城先登戰于鹿門擒其將張貴十年遷管軍萬戶領襄

陽諸路新軍十二年

據巴延傳增

從丞相巴延等渡江破獨

松關下長興取湖州行安撫司事十四年授湖州總管

進淮西道宣慰使十八年卒子達喇齊曲靖等路宣慰

使

布呼齊鴻吉哩氏世居應昌祖孟克以后族備太祖宿

衛父婁實克狀貌魁偉有謀善騎射太宗嘗問以軍旅

之事應對稱旨即命為千戶尋以為齊王府司馬後從

睿宗伐金有功詔還宿衛以疾卒布呼齊英邁有父風

幼孤能自刻厲暇日習弓馬夜則讀書承母訓期以成
父之志從軍有功襲父官為齊王司馬世祖親征納顏
以齊王兵從布呼齊躍馬陷陣所向披靡納顏遁走世
祖大悅授信州路達嚕噶齊時江南初附布宣上意與
民更始期年郡大治俄以疾卒追封范陽郡侯子托音
布哈郴州路達嚕噶齊

齊喇西域人世居太原由中書譯史從平章政事賽音
諤德齊經畧川陝至元十二年百官志作立雲南行省
十一年

署為幕官諸洞蠻夷酋長款附齊喇功居多十五年分
省大理會緬人入寇齊喇即以戰具資軍士討平之授
行中書省左右司員外郎十八年平章尼雅斯拉鼎遣

詣闕敷奏邊事世祖愛其聰辨練達拜鎮西平緬

原文脫平

字今据地理志增

麓川等路宣撫司達嚕噶齊兼管軍招討使

成都烏蒙諸驛阻絕齊喇市馬給傳往來使之俄被召
問以征緬事宜奏對稱旨諸王桑阿克達爾右丞台布
征緬命率兵船為鄉導拔其江頭城復從雲南王入緬

招徠其黨由是復業者衆後入覲僉緬中行中書省事
頒詔于緬宣布威德緬王稽顙稱謝遣世子信合八的
入貢

按信合八的經世大典作僧
如八的入貢事在大德元年

累遷雲南諸路行中

書省左丞大德四年卒

安巴唐古人祖森濟圖迎太祖于布琳塔爾哈納之地
太祖嘉其效順命為圖爾哈筆且齊兼克呼穆爾齊父
圖噲齊襲職事憲宗累官至文州禮店元帥府達嚕噶
齊安巴弱冠入宿衛性嚴重剛果有大志嘗親迎于燉

煌阻兵不得歸乃客居於于闐宗王阿勒呼木之所世祖遣色徹肯等使阿勒呼木以通好阿勒呼木留使者數年弗遣安巴悉以已馬駝贖之令逃去色徹肯等得脫歸具以白世祖世祖稱嘆久之既而命元帥布哈特穆爾等征于闐安巴乘間至行營布哈特穆爾承制命充樞密院客省使俄有旨護送其妻子來京師未幾宗王納顏叛世祖親征安巴在行間屢捷命為克爾叟布爾噶博勒卓等處萬戶諸王哈魯等叛安巴率所部兵

與戰身中七創鏖戰愈力生擒哈魯以獻世祖嘉其功
命長唐古衛兼僉樞密院事歷同僉副樞同知至知樞
密院事卒于位贈寧夏郡公謚忠遂子阿齊拉知樞密
院事琳沁巴勒自有傳

伊蘇岱爾喀喇人父阿勒巴巴勒呼太祖時率衆來歸
從南征力戰而死伊蘇岱爾世其官從丞相巴延經畧
襄樊攻百丈山灌子灘功居最及襄樊圍合即被甲先
登明年破復州殺其將以功陞百戶尋加千戶督五路

招討至元十六年改管軍總管江南平錄功進管軍萬戶領江淮戰艦數百艘東征日本全軍而還特賜養老一百戶二十二年移鎮泰州時籍民丁為兵得萬人以伊蘇岱爾為欽察親軍指揮使統之大德三年卒

實都爾欽察氏父托蘇隸蒙古軍籍中統三年從丞相巴延討李璫以功授百戶至元十年告老以實都爾代之十一年從大軍南征攻取襄陽唐鄧申裕鈞許等州累功授管軍總把將其父軍十四年從諸王拜穆爾追

擊珠爾噶岱雅布薩爾等平之十七年陞侍衛軍百戶
時亡宋猶有未附城邑實都爾願自舉兵下之諸城聞

風而附二十四年進漢洞右江萬戶府達嚕噶齊從鎮

南王征交趾駐兵萬劫右丞阿巴齊

按阿巴齊傳至元二十四年改湖廣

等處行尚書省右丞此處原文
訛作左丞且脫去齊字謹增改

命進兵拔其一字城明

年大兵進逼偽興道王居與交人戰于塔兒山臂中毒
矢灑血奮戰射死交人二十餘仍督諸軍乘勝繼進大
敗之遂入其都城又戰于韓村堡擒其將黃澤既而鎮

南王引兵還以實都爾為前軍行次陷泥關

安南國傳作內傍關

戰數十合交人却遂還迎鎮南王于女兒關交人四萬

餘

安南國傳作三十餘萬

截其要道時我軍乏食且疲于戰將佐

相顧失色實都爾率勇士奮戈衝擊之交人却遂全師而還二十六年授砲手軍匠萬戶府達嚕噶齊大德二年卒子額森特穆爾襲

欽定續通志卷四百七十三

欽定四庫全書

史部

欽定續通志卷四百七十四
七至

編修臣謝振定覆勘

總校官原任侍講臣王燕緒

欽定續通志卷四百七十四

列傳

元二十八

唐仁祖

多爾濟

和尚齊諾

劉容

嘉魯克龍達實

奇爾濟蘇

巴勒丹

烏魯斯

多羅台

額森布哈

伊奇哩

鄭溫

唐仁祖字壽卿輝和爾人祖曰唐古直子孫因以唐為氏父驥豪爽好射獵世祖即位命為裕宗潛邸筆且齊陞達魯噶齊仁祖少穎悟父沒母教之讀書通諸方語言尤邃音律中統初詔諸貴胄為質帝親閱之見仁祖曰是唐古直孫邪聰明無疑也俾習國字至元六年選充蒙古掾十六年錄囚平陽平反冤滯免死者十七人

十八年授翰林直學士時真定保定兩路錢穀逋負屢
歲不決遣仁祖往閱其牘皆中統舊案亟還奏罷之拜
參議尚書省事時丞相僧格秉政威焰方熾仁祖屢忤
之遷工部尚書僧格以曹務煩劇困之仁祖處之甚安
尋出使雲中僧格考工部織課稍緩怒遣驛騎追還遽
命直吏拘往督工且促其期曰違期必致汝于法左右
皆為之懼仁祖退召諸署長從容諭之曰丞相怒在我
汝等勿懼宜力加勉衆皆感激晝夜倍其功期未及而

辦乃罷已而僧格繫獄有旨命仁祖籍其家明日僧格以左右之援得釋衆駭然悉踰垣以竄仁祖獨不為之動僧格竟敗二十八年除翰林學士承旨遼陽饑奉旨偕近侍蘇克左丞實都往賑實都欲如戶籍口數大小給之仁祖曰昔之小口今已大矣可皆以大口給之俄除將作院使大德五年再授翰林學士承旨知制誥兼修國史以疾卒追封洹國公謚文貞子恕

多爾濟字道明西夏寧州人父旺扎勒結世掌其國史

初守西涼率父老以城降太祖有旨副賽音達呼為中
興路管民官世祖即位旺扎勒結卒遺奏請謹名爵節
財用帝嘉納焉多爾濟年十五通古注論語孟子尚書
帝召見于香閣奏對稱旨因問欲何仕多爾濟以西夏
營田十未墾一若以南軍子弟之成丁者別編入籍以
實屯力則地利多而兵有餘矣請為其總管以盡措畫
帝可之乃授中興路新民總管至官三載賦額增倍就
轉營田使秩滿入覲陞潼川府尹時公府無祿田多爾

濟乃以官曠地給民視秩分畝而薄其稅潼川仕者有
祿自此始未幾臺臣奏為雲南廉訪副使時雲南諸蠻
叛僚佐悉稱故去多爾濟獨居守又八月省臣大懼歸
符印欲遁多爾濟乃白于梁王得檄而後出遷山南廉
訪副使復調雲南廉訪使會行省丞相特們德爾貪暴
擅誅殺羅織安撫使布格呼丹將置于極刑多爾濟力
爭之竟獲免尋復其官後卒子仁通為雲南省理問天
歷二年雲南諸王與萬戶布呼等叛仁通率官軍捕之

没于陣

和尚裕勒巴拉巴約特氏祖哈喇徹爾率所部歸太祖
父古都斯齊力過人歲壬辰從睿宗破金將哈達軍於
三峯山以功賜號巴圖爾金亡授管軍百戶從攻宋唐
鄧穎蔡等州屢立戰功乙卯從攻漢上鐵城寨没于軍
贈沈國公謚武愍和尚襲父職己未從世祖攻鄂州中
統三年李璫叛從國兵討之戰老僧口斬獲甚衆陞阿
嚩罕萬戶府經歷至元五年攻襄陽軍務繁劇贊畫有

方十一年從丞相巴延渡江與宋軍戰于柳子魯泚新
灘沌口有功十二年從平章阿爾哈雅攻拔岳州取沙
市至江陵諭降宋安撫使高達以功陞行省郎中從國
兵圍潭州十三年城破諸將欲屠其城和尚止之由是
湖南諸郡聞風皆下改行省斷事官徇地廣西督前軍
攻破靜江遂兼行宣撫事廣西平授常德路達魯噶齊
以治最聞擢嶺南廣西道提刑按察使時阿爾哈雅恃
功驕恣和尚劾奏不少貸遷江南浙西道提刑按察使

浙西宋故郡民衆事繁在職惟務鎮靜人服其知大體
卒於官追封沆國公謚莊肅子齊諾

齊諾以御史大夫伊嚕諾延薦入見大安閣世祖卽以
其父官授之拜江南浙西道提刑按察使二十六年遷
淮西江北道提刑按察使時僧格秉政擅權人莫敢言
齊諾入朝極陳其罪狀帝為之改容及僧格誅又言其
黨猶布中外宜早處分三十一年遷江東建康道肅政
廉訪使時東平大名諸路有諸王牧馬草地與民田相間

互相侵冒連歲爭訟不能定命齊誥治之訟遂息大德
二年奉詔使淮東西問民疾苦察官吏能否還奏軍民
便宜三十事多見採用歷江西湖東江南湖北兩道廉訪
使時中書平章巴延等固位日久黨與衆盛所任之人
徇情玩法齊誥撫其實上于憲臺以聞巴延等皆被黜
七年授大都路總管兼大興府尹馭吏治民有方俄同
簽樞密院事上疏言蒙古軍在山東河南者往戍甘肅
跋涉艱苦請以近甘肅之兵戍之而免山東河南諸軍

詔從之未幾遷參議中書省事贊決機務精練明敏成
宗崩迎仁宗于潛邸奉武宗即位拜平章政事商議樞
密院事左翼萬戶府達魯噶齊提調屯田事延祐五年
致仕給半俸終其身家居七年卒追封衛國公謚景憲
子倫布監察御史壽通洪澤屯萬戶布呼齊南臺御史
觀音保襲洪澤屯萬戶巴延呼圖克翰林國史院經歷
劉容字仲寬其先西寧青海人高祖阿勒華西夏主尚
食西夏平徙西寧民於雲京容父海川在徙中後遂為

雲京人容幼穎悟稍長喜讀書善騎射中統初入侍皇太子於東宮命專掌庫藏每退直即詣國子祭酒許衡衡亦與進之至元七年世祖聞容知吏事命權中書省掾事以忠直稱十五年奉旨使江西撫慰新附之民或勸其受遺以賂權貴容曰剝民以利吾心何安使還惟載書籍數車獻之皇太子忌嫉者從而讒之由是稍疎容容亦終不辯會立詹事院容上言曰太子天下本苟不得端人正士左右輔翼之使傾邪側媚之徒進必有損

令德聞者是之俄命為太子司議改祕書監未幾出為
廣平路總管以疾卒於官

嘉魯克羅達實輝和爾人通天竺教及諸國語世祖召
入朝命從國師習其法及言與字期年皆通以輝和爾
字譯西天西番經論西南小國星噶爾德威二十餘種
來朝嘉魯克羅達實於帝前敷奏其表章諸國驚服朝
議興兵討暹國羅斛馬八兒俱藍蘇木都刺諸國嘉魯
克羅達實請遣使諭以禍福不服而後攻之帝納其言

命使往降者二十餘國至元二十四年擢翰林學士承旨遣侍成宗於潛邸且俾以節飲致戒成宗即位遷大司徒仁宗即位加開府儀同三司是年卒

奇爾濟蘇蒙古阿齊台氏曾祖巴爾斯布哈從攻奈曼欽察俄羅斯滿濟勒噶回回諸國常為先鋒破敵太祖嘉之及諭降豐州雲州擢充宣撫使祖呼雅克和斯襲職改河中府達嚕噶齊卒父伊實摩建康路達嚕噶齊致仕奇爾濟蘇初以宿衛克博囉齊至元二十五年擢

司農少卿累陞行湖廣平章討平海南生黎諸峒寨大

德三年

按地理志征東行省立于大德三年原文作二年誤今改正

改征東省平章

政事高麗刑政無節官冗民稀因悉加裁正以聞有旨
徵入見俾條析便民事宜五年復拜湖廣平章踰年改
陝西以目疾還京師加官至雲南諸路行省左丞相卒
子鄂勒哲湖廣右丞征廣西賊卒于軍

巴勒丹輝和爾人

按原史舊作蘇爾約蘇圖和琳傳而多載其子巴勒丹事蹟今改作巴勒

丹傳父蘇爾約蘇圖和琳太祖時來歸從征回回國還事

睿宗於潛邸以為真定路斷事官巴勒丹事世祖為博羅齊鷹房萬戶從征哈喇章及額呀布格俱有功後從裕宗北征至托哈尼嚕袞命歸守真定未幾改隆興府達魯噶齊遷授中書右丞居三年海都叛奉旨從噶瑪拉太子往征之師還卒贈司徒子阿里實登德服阿薩爾琳沁俱以仕顯

烏魯斯喀喇氏曾祖哈斯巴延為莊聖太后宮牧官祖海都從憲宗征釣魚山歿於陣父莽賚特穆爾世祖時

為筆且齊為魯斯以內府筆且齊至元中拜監察御史
遷雲南行省理問後以忤僧格被譖籍其家唯金玉帶

各一黃金五十兩皆帝所賜者乃獲免二十六年置八

番羅甸宣慰司進宣慰使時諸蠻叛服不常為魯斯平

之乃立安撫等司以守焉

經世大典及元地理志並作
至元十六年事本傳繫之二

十六年
恐誤

二十八年平楊都要等累官至四川行省平章

政事至大二年召還皇慶二年卒贈益國公子博囉布

哈初直宿衛至大元年為翰林侍講學士以父疾歸侍

延祐四年復入侍至治二年襲授河南府同知子察罕
布哈隆禧總管府副達魯噶齊

多羅台唐古氏祖蘇爾楚太祖時以業弓進賜名齊勒
烏蘭命為弓匠百戶卒父塔爾古台襲職額呼布格叛
從戰於蘇瑪勒圖之地死之多羅台從萬戶伊蘇岱爾
伊囉幹齊等累戰有功授前衛親軍百戶積官為陂屯
田千戶所達魯噶齊後以疾退弟庫庫楚亦業弓嘗獻
所造弓帝稱善問知為塔爾呼台之子因試之射命為

近侍明年武備寺臣復以其弓獻且奏用之擢為大同
路廣勝庫逢嚕噶齊廣勝者貯兵器之所時總管唐古
哈雅以庫作公署寘甲仗於虛廩多被蟲鼠之害庫庫
焚言於帝復之使者色辰布哈納蘇羅丹以檄取鷹房
軍衣甲弓矢庫庫焚責其入文書領去憲副色埒默令
毋入文書庫庫焚不從事聞帝命答色埒默罷之累官
大寧路總管卒于官多羅台之子托歡初直宿衛歷官
至四川廉訪司僉事樞密院都事陞斷事官嘗上疏請

停罷修寺及減省供佛飯僧之費又請富商大賈宜與軍民一體應役回回諸色人等不許賣寶中賣以虛國用其辭懇切當時稱之

額森布哈蒙古齊喇氏祖實喇阿古爾兄弟四人長圖卜布哈次齊哩克季哈喇阿古爾方太祖微時齊哩克已深自結納偕兄弟率屬來歸太祖遇之特異他族命為筆且齊長實喇阿古爾早世其子博爾歡事睿宗入宿衛憲宗即位與蒙古薩勒密贊謀議拜中書右丞相

遂專國政至元元年以黨附額呼布格論罪伏誅子四人額森布哈初世其職為筆且齊長裕宗封燕王世祖命為之傅且謂之曰額森布哈舊臣子孫閑習典故爾每事問之必不使爾為不善也二十三年拜雲南諸路行中書省平章政事時阿郎可馬丁諸種焚夷為變討平之遂立登雲等路府州縣六十餘所官其酋長定其貢稅邊境以寧大德二年遷湖廣行省平章為政明決會汴梁行省有妖獄飛語連湖廣平章政事劉漢傑右

承燕公楠朝廷召二人入二人與額森布哈嘗有違言至是急遣使附奏明其無他二人皆得釋八年遷平章

河南行省河決落黎堤督有司備之汴以無患

按河渠志載大

德九年黃河決從逼近汴梁幾至浸沒本處官司權宜開闢卒無成功語異本傳

九年進拜湖

廣等處行省左丞相至大二年卒天曆二年贈恒陽王

謚文貞子五人曰額琳沁曰圖嚕曰塔斯曰齊喇曰阿

勒垣阿勒垣事成宗龔長宿衛有旨給傳往待其父以

孝行聞拜海北海南道宣慰使都元帥時海島生黎叛

服不常阿勒坦威望素著夷人帖服皆願輸貢稅至大二年奔父喪于武昌以哀毀致疾卒天曆二年追封特進趙國公中書左丞相謚貞孝

伊奇哩女真人幼穎悟及長以孝友聞事世祖潛邸得備宿衛中統初命參議陝西行院事未幾改行省斷事官復入宿衛李璫平朝議選宿衛之士監漢軍伊奇哩監軍於毗陽至元七年命為監戰以所領軍圍襄陽築一字堡以張軍勢一時名將索多剌國傑李庭等皆隸

麾下攻樊城率其軍先登破之所受賜悉分將士十一年從丞相巴延次郢州時糧儲不繼伊奇哩攻江陵龍灣堡得粟萬石衆賴以濟大軍東下宋將夏貴迎戰於

陽邏洲

阿珠巴延等傳
並作陽羅堡

巴延未至衆欲少俟之伊奇哩

曰兵貴神速機不可失宜及其未定而擊之遂直前衝貴軍獲戰船百餘貴敗走十二年攻常州伊奇哩造雲梯繩橋以登遂克之徇下安吉諸州十三年宋降巴延命伊奇哩監守其宮號令嚴肅秋毫無犯入朝錄功遷

浙東宣慰使鎮守紹興十九年卒子齊拉衮江東廉訪使托克托淮東宣慰使

鄭溫真定靈壽人初從中書鈞祜祿納罕南征授千戶憲宗征西川溫四月不解甲史天澤言其功帝曰朕所親見也賜名伊克巴圖還至闐州奉旨分軍守邏天澤命統四千人警邏釣魚山中統三年李璫叛詔溫以軍還討至濟南大軍圍其城賊將乘夜斫營溫力戰却之至元六年進右衛副都指揮使九年詔統蒙古漢人女

真高麗諸部軍渡海征耽羅平之

耽羅國傳作至元十年事

十二年

率三衛軍從攻岳州江州沙市潭州皆有功江淮行省
參知政事杭民饑出米二十萬石糶之俄賜常州官田
三十頃二十三年陞江浙左丞命以新附漢軍於淮安
雲山泉塘立屯田二十八年卒子欽利用監丞釭權茶
都運使銓右衛親軍千戶鑄袁州路判官

欽定續通志卷四百七十四

欽定四庫全書

欽定續通志卷四百七十五

列傳

元二十九

王磐

王鶚

高鳴

李冶

李昶

劉肅

王思廉

李謙

徐世隆

孟祺

閻復

王磐字文炳廣平永年人父禧金末入財佐軍興補進
義副尉國兵破永年將屠其城禧復罄家貲以助軍費
衆賴以免金人遷汴乃舉家南渡河居汝之魯山磐年
方冠從麻九疇學于郟城正大四年擢經義進士第授
歸德府錄事判官不赴及河南被兵磐避難轉入淮襄
間襄陽兵變乃北歸至洛會楊惟中被旨招集儒士得

磐深禮遇之遂寓河內東平總管嚴實興學養士迎磐
為師受業者常數百人中統元年即拜益都等路宣撫
副使頃之以疾免李璫素重磐以禮延致磐亦樂青州
風土乃買田泚河上題其居曰鹿菴有終焉之意及璫
謀不軌磐覺之脫身入京師因侍臣以聞世祖即日召
見嘉其誠節撫勞甚厚璫據濟南大軍討之帝命磐參
議行臺事璫平召拜翰林直學士同修國史

按蘇天爵
元史類載

王磐以金有天下凡九帝共一百二十年其守成之善
者莫如世宗謹就實錄中撫其行事一百八十餘條於

至元二年同徐世隆王鶚上進名曰
大定治績本傳不載謹附識于此

出為真定順德等

路宣慰使時蝗起真定朝廷遣使者督捕役夫四萬人以
為不足欲牒鄰道助之磐曰四萬人多矣何煩他郡使
者怒責磐狀期三日盡捕蝗磐不為動親率役夫走田
間設法捕之三日而蝗盡滅使者驚以為神復入翰林
為學士入謁宰相首言方今害民之吏轉運司為甚至
稅人白骨宜罷去之以蘇民力由是運司遂罷阿哈瑪
特諷大臣請合中書尚書兩省為一拜右丞相安圖為

三公陰欲奪其政柄有詔會議磐言合兩省為一而以

右丞相總之實便不然則宜仍舊三公既不預政事虛

設何為議遂沮

按阿哈瑪特傳至元七年立尚書省以阿哈瑪特平章尚書省事九年併尚書

省入中書省以阿哈瑪特為中書省平章政事與百官志相符本傳及安圖陳祐傳並云其事遂罷豈已罷而復行歟抑傳遷太常少卿時宮闕未建朝儀未立凡遇稱

失其實歟

賀臣庶雜至帳殿前誼擾不能禁磐上疏曰按舊制天子宮門不應入而入者謂之闌入闌入之罪由第一門至第三門輕重有差宜令宣徽院籍百官姓名各依班

序聽通事舍人傳呼贊引然後進其越次者殿中司糾察定罰不應入而入者準闌入罪庶朝廷之禮漸可整肅於是儀制始定曲阜孔子廟歷代給民百戶以供灑掃復其家至是尚書省以括戶之故盡收為民磐言林廟戶百家歲賦鈔不過六百貫僅比六品官終年俸耳聖朝疆宇萬里財賦歲億萬計豈愛一六品官俸不以待孔子哉且於府庫所益無多其損國體甚大時論避之磐嘗於會議之際數言前代用人二十從政七十致

仕所以資其材力閱其衰老養其廉恥之心也今入仕者不限年而老病者不能退彼既不自知恥朝廷亦不以爲非甚不可也至是引年乞致仕帝遣使諭之曰卿年雖老非任劇務何以辭爲磐不得已復起時方伐宋凡帷幄謀議有未決即遣使問之所陳每稱上意帝將用兵日本問以便宜磐曰今方伐宋當用吾全力庶可一舉取之若復分兵島夷恐曠日持久功卒難成江南既下磐上疏言宜禁戢軍士選擇官吏賞功罰罪推廣

恩信所以撫安新附銷弭寇盜其言要切皆見施行朝議汰冗官權近以按察司不便欲併省之磐奏曰各路州郡去京師遙遠貪官汙吏侵害小民無所控告惟賴按察司為之申理若指為冗官一例罷去則小民冤死而無所訴矣由是按察司得不罷朝廷錄平宋功遷至宰相執政者二十餘人因議更定官制磐奏曰歷代制度有官品有爵號有職位官爵所以示榮寵職位所以委事權臣下有功有勞隨其大小酬以官爵有才有能稱

其所堪處以職位此人君御下之術也臣以為有功者宜加遷散官或賜五等爵號不宜任以職位日本之役師行有期磐入諫曰日本小夷海道險遠勝之則不武不勝則損威矣臣以為勿伐便帝震怒謂非所宜言且曰此在吾國法言者不赦汝豈有他心耶磐對曰臣赤心為國故敢言且臣年已八十無子他心欲何為耶明日帝遣侍臣溫言慰撫磐以年老累乞骸骨詔致仕仍給半俸終身命其壻著作郎李穡賓為東平判官以便

養磐資性剛方不妄言笑每奏對必以正不肯阿順帝嘗以古直稱之阿哈瑪特方得權致重幣求碑文磐拒弗與所薦士皆為名臣年九十二卒封洛國公謚文忠王鶚字百一曹州東明人金正大元年中進士第一授應奉翰林文字金主遷蔡詔尚書省移書恒山公武仙進兵金主覽書問誰為之省丞以鶚對曰朕即位時狀元耶召見惜擢用之晚授尚書省右司郎中蔡陷將被殺萬戶張柔聞其名救之輦歸館于保州世祖在藩邸

訪求遺逸士遣使聘之及至使者數輩迎勞召對進講
孝經書易及齊家治國之道世祖曰我雖未能即行汝
言安知異日不能行之耶歲餘乞還仍命近侍庫庫等
五人從之學繼命徙居大都嘗因間請曰天兵克蔡金主自
經其奉御經實焚葬汝水之傍禮為舊君有服願往葬
祭世祖義而許之庚申世祖即位首授翰林學士承旨
制誥典章皆所裁定至元元年奏言自古帝王得失興
廢可考者以有史在也國家以神武定四方天戈所臨

無不臣服皆出太祖皇帝廟謨雄斷所致若不乘時紀
錄竊恐久而遺亡臣竊以為宜置局纂就實錄附修遼
金二史又言唐太宗始定天下置弘文館學士十八人
宋太宗承開創之後設內外學士院史冊爛然號稱文
治堂堂國朝豈無英才如唐宋者乎皆從之由是始立
翰林學士院鶚遂薦李治李昶王磐徐世隆高鳴為學
士按李愷名臣言行錄云初鶚侍潛邸嘗舉楊奐元好
問修金史未及召而卒又舉李治李昶王磐徐世隆
圖克坦公履高鳴為學士楊恕孟攀鱗為待制王惲雷
膺為修撰周砥胡祗適孟祺闕復為應奉凡前後遺老

及當時鴻儒搜扶殆
盡所載校本傳為詳

復奏立十道提舉學校官有言事

者謂宰執非其人詔儒臣廷議可任宰相者時阿哈瑪
特巧佞欲乘隙取相位衆知其非莫敢言鶚奮然擲筆
曰吾以衰老之年無可報國即欲舉任此人為相吾不
能插驢尾矣振袖而起奸計為之中止五年乞致仕詔
有司歲給廩祿有大事則遣使就問之十年卒謚文康
鶚性樂易為文章不事雕飾嘗曰學者當以窮理為先
分章析句乃經生舉子之業非為己之學也著論語集

義一卷汝南遺事二卷詩文四十卷曰應物集

高鳴字雄飛真定人少以文學知名諸王錫里庫將征西域聞其賢遣使者三輩召之鳴乃起為王陳西征二十餘策王數稱善薦為彰德路總管世祖即位授翰林學士兼太常少卿至元五年立御史臺以鳴為侍御史風紀條章皆所裁定天下初定中書樞密事多壅滯言者請置督事官各二人鳴曰官得人自無滯政臣職在奉憲願舉察之母為員外置人也七年議立三省鳴上封

事曰臣聞三省設自近古其法由中書出政移門下議不合則有駁正或封還詔書議合則還移中書中書移尚書尚書乃下六部郡國方今天下大於古而事益繁取決一省猶曰有壅况三省乎且多置官者求免失政也但使賢俊萃于一堂連署參決自免失政豈必別官異坐乎不如一省便世祖深然之議遂罷川陝盜起省臣患之請專戮其尤者以止盜朝議將從之鳴諫曰制今天下上死囚必待論報所以重用刑惜民生也今從

其請是開天下擅殺之路害仁政甚大世祖令速止之
鳴每以敢言被上知嘗入內值大風雪帝謂御史大夫
塔齊爾曰高學士年老後有大政就問可也九年遷吏
禮部尚書十一年病卒中州志云謚文獻

李治字仁卿真定藥城人登進士第辟知鈞州事金亡
治微服北渡流落忻崞間世祖在潛邸聞其賢遣使召
之既至問河南居官者孰賢對曰險夷一節惟完顏仲
德耳又問魏徵曹彬何如對曰徵忠言謹論知無不言

以唐諍臣觀之徵為第一彬伐江南未嘗妄殺一人擬
之方叔召虎可也又問今之臣有如魏徵者乎對曰今
以側媚成風欲求魏徵之賢實難其人又曰今之人材
賢否對曰天下未嘗乏材求則得之理勢然也今儒生
如魏璠王鸚李獻卿蘭光庭趙復郝經王博文輩皆有
用之才又皆賢王所嘗聘問者舉而用之何所不可但
恐用之不盡耳又問天下當何以治之對曰為治之道
立法度正紀綱而已紀綱者上下相維持法度者賞罰

示懲勸今則大官小吏下至編氓皆自縱恣以私害公
是無法度也有功者未必賞有罪者未必罰甚則有功
者或被辱有罪者反獲寵是無法度也法度廢紀綱壞
天下不變亂已為幸矣又問昨地震何如對曰天裂為
陽不足地震為陰有餘夫地道陰也陰太盛則變常今
之地震或姦邪在側或女謁盛行或讒慝交至或刑罰
失中或征伐驟舉五者必有一于此矣夫天愛君如愛
子故示此以警之苟能上當天心下協人意則可轉咎

為休矣世祖嘉納之治晚家元氏買田封龍山下及世祖即位復聘至欲處以清要治以老病懇還山至元二年再以學士召就職尋辭去卒于家所著有敬齋文集四十卷壁書藁削十二卷泛說四十卷古今難四十卷測圓鏡海十二卷益古行疑三十卷

李昶字士都東平順城人父世弼從外家受孫明復春秋得其宗旨昶年十六已能為程文興定二年廷試父子同以春秋中進士第褻貶各異時人比之向歆昶釋

褐授孟州溫縣丞國兵下河南奉親還鄉里行臺嚴實
辟為都事實卒子忠濟嗣遷昶為經歷時朝廷裁抑諸
侯法制寢密忠濟縱侈自若昶以親老求解不許俄以
父憂去官杜門教授一時名士李謙馬紹吳行輩皆出
其門世祖伐宋次濮州聞昶名召見聞治國用兵之要
昶上疏論治國則以用賢立法務本清源為對論用兵
則以伐罪救民不嗜殺為對世祖嘉納之及即位召至
開平訪以國事昶知無不言時微需煩重行省科稅賦

雖逋戶不貸昶移書時相曰百姓困於弊政久矣聖上
龍飛首頒明詔天下之人如獲更生拭目傾耳以俟太
平半年之間人漸失望良以渴仰之心太切興除之政
未孚故也側聞欲據丁巳戶籍科徵租稅比之見戶或
加多十六七比驗見戶應輸猶恐不逮復令包補逃故
必致艱難苟不以撫字安集為心惟事供億則諸人皆
能之豈聖上擢賢更化之意哉於是省府為蠲逋戶之
賦中統二年內難平昶上表賀因進諷諫曰患難所以

存儆戒禍亂將以開聖明伏願日新其德雖休勿休安
不忘危治不忘亂恒以北征宵旰之勤永為南面逸豫
之戒帝稱善久之會嚴忠濟罷以其弟忠範代忠範表
請昶師事之特授翰林侍講學士行東平路總管軍民

同議官昶條十二事剋除宿弊

按蘇天爵名臣事畧云
朝議令老疾輸賦昶上

言曰聖主即位之初凡鰥寡疾廢之人命所在優恤去
歲省府常有榜諭俾給糧收養旬月之間一予一奪非
所以示信也元史稱昶
條十二事此或其一歟至元元年遷轉之制行減併路

府州縣官員於是謝事家居五年起為吏禮部尚書品

格條式選舉禮文之事多所裁定凡議大政宰相延置
上座傾聽其說六年姦臣阿哈瑪特議陞制國用使司
為尚書省昶請老以歸八年授山東東西道提刑按察
使務持大體不事苛細未幾致仕二十六年卒昶嘗集
春秋諸家之說折衷之曰春秋左氏遺意二十卷取孟
子新舊說矛盾者參考歸一附以己見為孟子權衡遺說五卷

劉肅字才卿威州洺水人金興定二年詞賦進士嘗
為尚書省令史調新蔡令先時縣賦民以牛多寡為

差民匿不耕肅至命樹畜繁者不加賦民遂殷富潁淮
民有竄入宋境籍為兵而優其糧間有歸者頗艱於衣
食時出怨言曰不如渡淮告者以謀叛論肅曰淮限宋
境一水耳果欲不難往也口雖言而心無實準律當杖
八十奏可繼擢戶部主事金亡依東平嚴實辟行尚書
省左司員外郎東平歲賦絲銀復輸綿十萬兩色絹萬
匹民不能堪肅贊寶奏罷之世祖居潛邸以肅為邢州
安撫使肅興鐵冶及行楮幣公私賴焉中統元年擢真

定宣撫使時中統新鈔行罷鈔銀不用公私囂然莫知
所措肅建三策一曰仍用舊鈔二曰新舊兼用三曰官
以新鈔如數易舊鈔中書從其第三策遂降鈔五十萬
貫二年授左三部尚書官曹典憲多所議定未幾兼商
議中書省事以年老致仕四年卒肅性舒緩有執守嘗
集諸家易說曰讀易備忘追贈邢國公謚文獻子憲禮
部侍郎遜

按虞集撰劉賡神道碑云賡官一品年七十而父慙無恙史傳作肅子憲遜無慙名疑有

缺誤

謹識 大名路總管孫賡自有傳

王思廉字仲常真定獲鹿人幼師太原元好問既冠張

德輝

按元史原作張德耀誤今謹據張德輝本傳改正謹識

宣撫河東辟思廉掌

書記復謝歸至元十年董文忠薦之世祖問曰汝何由

知王思廉賢對曰鄉人之善者稱之也召見授符寶局

掌書十四年遷翰林待制嘗進讀通鑑至唐太宗有殺

魏徵語及長孫皇后進諫事命內官引至皇后閣講行

其說每侍讀必命諸大臣咸聽授焉帝嘗御延春閣大

賚羣臣俾十人為列以進思廉偶在衛士之列帝責董

文忠曰思廉乃儒臣豈宜列衛士十九年帝幸白海時
千戶王著矯殺姦臣阿哈瑪特於大都辭連樞密副使
張易帝召思廉至行殿屏左右問曰張易反若知之乎
對曰未也帝曰反已反已何未也思廉徐奏曰僭號改
元謂之反亡入他國謂之叛羣聚山林賊害民物謂之
亂張易之事臣實未之詳也帝曰朕往者有問於竇默
其應如響蓋心口不相違故不思而得朕今有問汝能
然乎且張易所為張仲謙知之否思廉即對曰仲謙不

知帝曰何以明之對曰二人不相安臣故知其不知也
思廉以儒素進帝眷注優渥裕宗居東宮思廉進曰殿
下府中宜建學官俾左右近侍嘗親正學必能裨輔明
德裕宗然之二十三年改同知大都留守藩王納顏叛
帝親征思廉謂留守段貞曰藩王反側地大故也漢鼂
錯削地之策實為良圖貞見帝以聞帝曰汝何能出是
言貞以思廉對帝嘉之大德元年遷翰林學士以病歸
三年起為工部尚書拜征東行省參政十一年授太子

賓客旋以翰林學士承旨致仕延祐七年卒封恒山郡公諡文恭

李謙字受益鄆之東阿人始就學日記數千言為賦有聲與徐世隆孟祺閻復齊名教授東平時教授無俸郡斂儒戶銀百兩備束修謙辭曰家幸非甚貧豈可聚貨以自殖乎翰林學士王磐以謙名聞召為應奉翰林文字至元十八年陞太子左諭德侍裕宗於東宮陳十事曰正心睦親崇儉幾諫戢兵親賢尚文定律正名革弊

裕宗薨又命傅成宗於潛邸所至以謙自隨轉侍讀學

士二十六年以足疾辭歸大德六年召為翰林承旨尋

引年致仕仁宗即位召十六人謙居其首

按續綱目載至大四年召

先朝舊臣知政務者老臣程鵬飛董士選李謙張律陳天祥尚文劉正郝天挺董士珍蕭軒劉敏中王思廉韓從益趙君信程文海十五人

詣闕同議庶政與史傳較異

至行在疏言九事曰正心

術以正百官崇孝治以先天下選賢能以居輔相之位

廣視聽以通上下之情恤貧乏以重邦家之本課農桑

以豐衣食之源興學校以廣人材之路頒律令使民不

犯練士卒居安慮危至於振肅紀綱糾察內外臺憲之
官尤當選素著清望深明治體不事苛細者為之帝嘉
納焉遷集賢大學士歸卒于家謙文章醇厚有古風不
尚浮巧學者宗之號野齋先生子侃官至大名路總管
徐世隆字威卿陳州西華人金正大四年進士辟為令
其父戒之曰汝年少學未至母急仕進俟三十入官未
晚也世隆遂辭官益篤于學明習前代典故尤精律令
父歿奉母北渡河嚴實招致東平幕府俾掌書記世隆

勸實收養寒素一時名士多歸之世祖在潛邸召見于日月山時方圖征雲南以問世隆對曰君人者不嗜殺人天下可定況蕞爾之西南夷乎世祖曰誠如卿言吾

事濟矣實時得金太常登歌樂世祖遣使取觀世隆典

領以行

按禮樂志載憲宗二年命東平萬戶嚴忠濟立局肄習五月召太常禮樂人赴日月山學士徐

世隆郎中姚樞等以樂工李明昌等五十人見于行宮本傳作世祖取觀與志異

既見世祖勉

留之辭以母老中統元年擢燕京等路宣撫使中書省檄諸路養禁衛羸馬以萬計吏白軍需責重宜先戒備

世隆曰國馬牧於北方往年無餉於南者上新臨天下
京畿根本地煩擾之事必不為之馬將不來遂弗為備
馬果不至三年宣撫司罷世隆罷還東平請增宮縣大

樂文武二舞令舊工教習以備大祀制可除世隆太常

卿以掌之

禮樂志作敕太常少卿王鏞領東
平樂工常加肄習以備朝廷之用

兼提舉本

路學校事帝嘗問為君之道世隆取書所載堯舜禹湯
事以對帝喜曰汝為朕直解進讀朕將敬聽之書成帝
命翰林譯寫以進至元元年遷翰林侍講學士兼太常

卿朝廷大政諮訪而後行世隆奏事之大者首惟祭祀
祭必有廟因以圖上乞敕有司以時興建從之踰年而
廟成遂迎祖宗神御奉安太室行大饗禮帝悅俄兼戶
部侍郎承詔議立三省遂定內外官制又奏定百官朝
會儀七年遷吏部尚書撰選曹八議九年乞補外授東
昌路總管至郡專務以德率下不事鞭箠吏不忍欺民
亦化服十四年為山東提刑按察使時有妖言獄逮捕
數百人世隆剖析誣誤者十八九悉縱遣之尋移淮東

有告宋將許瓊匿官庫財物有司追繫其妻孥世隆曰
瓊所匿者故宋之物豈得與今盜官財者同論抗章辯
白行臺是之釋不問十七年召為翰林學士以疾辭二
十二年安圖再入相言世隆雖老尚可用遣使徵之不
至附奏便宜九事尋卒有瀛洲集百卷文集若干卷

孟祺字德卿宿州符離人幼敏悟早知問學侍父徙居
東平時嚴實修學校招生徒立考試法棋就試登上選
辟掌書記廉希憲宋子貞皆器遇之以聞于朝擢國史

院編修官遷應奉翰林文字至元七年持節使高麗還稱旨十二年丞相巴延伐宋詔選宿望博學可贊畫大計者與俱行遂授棋行省諮議時軍書填塞棋酬應剖決略無凝滯及戰焦山宋軍下流棋曰不如乘勢速進以奪彼氣如其言大破之巴延喜曰不意書生乃知兵若是諸將利劫掠爭趨臨安巴延問計棋對曰若以兵相迫彼必竄關一旦盜起臨安三百年之積焚蕩無遺矣莫若以計安之令彼不懼正如取果稍待時日耳巴

延然其言乃草書遣人至臨安以安輯之宋乃不復議

遷闕

按宋史陳宜中傳云元兵薄獨松關宜中入宮請遷都太后不許宜中痛哭請之太后命具裝以俟

及暮宜中不入乃不果遷本傳所言特史氏假以表棋之功耳棋復自請為使徵降表

至則會宋相于三省夜三鼓議未決棋正色曰國勢至

此夫復何待遂定議書成宋謝太后內批用寶攜之以

出復啟太后於內殿取國璽十二枚出巴延將親封之

棋止之曰管鑰自有主者非所宜親一有不謹恐異時

姦人妄相染汙終不可白遂止江南平巴延奏棋前後

功多且言棋可任重陞授嘉興路總管棋至首以興學
為務創立規制在官未久以疾歸東平十八年卒贈魯
郡公諡文襄子二人遵適

閻復字子靖其先平陽和州人祖行仕金歿王事父忠
辟兵山東之高唐遂家焉復弱冠入東平學師事名儒
康煜時嚴實領東平行臺招諸生肄進士業迎元好問
校試其文預選者四人復為首辟掌書記至元八年王
磐薦為翰林應奉以才選充會同館副使扈駕上京賦

應制詩寓規諷意世祖顧和爾果斯曰有才如此何可不用十四年出僉河北河南道提刑按察司事十六年入為翰林學士以州郡校官多不職建議定銓選之法二十八年尚書省罷復立中書省帝急於擇相一日召入便殿諭之曰朕欲命卿執政何如復謝不足勝任帝謂侍臣曰書生識義理存謙讓是也勿強乃改授浙西道肅政廉訪使先是僧格當國嘗有旨命翰林撰僧格輔政碑僧格既敗詔有司陪其碑復坐是免官成宗即

位以舊臣召入朝除集賢學士元貞元年上疏言京師
宜首建宣聖廟學定釋奠雅樂又言曲阜守塚戶不宜
聽有司併入民籍其後詔賜孔林灑掃二十八戶祀田
五千畝皆復之請也三年因星變又上疏言定律令頒
封贈增俸給通調內外官且曰古者刑不上大夫今郡
守以徵租受杖非所以厲廉隅江南公田租重宜減以
貸貧民後多采用大德四年帝召復至榻前密諭之曰
中書庶務繁重左相難其人卿為朕舉所知以哈喇哈

斯對帝大喜即命入相

按哈喇哈斯入相宰相表作大德三年哈喇哈斯傳作二年本

傳載在四年互異

復亦拜翰林學士承旨復首陳三事曰惜名

器明賞罰擇人材言皆剴切未幾遙授平章政事復力辭不許上疏乞骸骨詔從皇慶元年卒謚文康有靖軒集五十卷

欽定續通志卷四百七十五